



TEKS UCAPAN

**YB DATO' SRI HAJAH NANCY BINTI HAJI SHUKRI
MENTERI PEMBANGUNAN WANITA, KELUARGA DAN MASYARAKAT**

**PROGRAM ADVOKASI PERLINDUNGAN KANAK-KANAK:
KASIH KANAK-KANAK PERINGKAT NEGERI TERENGGANU**

TARIKH/MASA/LOKASI

**29 OGOS 2024 (KHAMIS) | 10.30 PAGI
SK SULTAN SULAIMAN II, KUALA TERENGGANU**

Kemaskini: 28 Ogos 2024

Terima kasih Pengerusi Majlis.

Assalamualaikum Warahmatullahi Wabarakatuh,
Salam Sejahtera dan Salam Malaysia Madani

(SALUTASI AKAN DISEDIAKAN)

Selamat pagi kepada adik-adik semua!

1. Alhamdulillah, marilah kita bersyukur ke hadrat Allah s.w.t kerana dengan rahmat dan inayahNYA, kita dapat berkumpul dalam **Program Advokasi Perlindungan Kanak-Kanak: KASIH Kanak-Kanak Peringkat Negeri Terengganu Tahun 2024** pada pagi ini.
2. Program ini penting untuk memastikan keselamatan dan kebajikan kanak-kanak sentiasa dipelihara dan hak sebagai

kanak-kanak dipenuhi iaitu dilindungi, dapat meneruskan kehidupan dalam suasana yang selamat, suara mereka didengari serta usaha membangunkan potensi diri mereka sebagai pemimpin negara pada masa depan.

3. Tahukah adik-adik semua yang setiap anak di Malaysia ada hak untuk dilindungi dan hidup dengan aman? Kita juga ada undang-undang di Malaysia yang khusus untuk menjaga kanak-kanak.

4. Terdapat **empat hak utama** yang penting bagi kanak-kanak seperti:

- a. hak untuk hidup,
- b. perlindungan,
- c. perkembangan,
- d. penyertaan.

5. Oleh itu, **sekiranya mana-mana empat hak ini tidak diberikan atau dijaga, adik-adik semua sebagai kanak-kanak, mempunyai hak untuk menyuarakan dan meminta**

bantuan daripada orang dewasa, seperti cikgu, ibu bapa atau jiran.

6. Selain itu, adik-adik perlu tahu juga apa itu sentuhan selamat dan sentuhan tidak selamat. Sentuhan selamat ialah sentuhan yang membuatkan kita rasa selesa, seperti pelukan ibu bapa atau berjabat tangan dengan kawan. Sentuhan tidak selamat pula ialah sentuhan yang membuatkan kita rasa takut, marah, atau tidak selesa. Jika ada sesiapa yang menyentuh kamu dengan cara yang membuatkan kamu rasa tidak selamat,

kamu mesti beritahu orang dewasa yang kamu percayai, seperti ibu bapa atau guru.

7. Selain sentuhan tidak selamat, kita juga perlu berhati-hati dengan buli siber. Buli siber berlaku apabila seseorang menggunakan internet untuk mengganggu, menghina, atau menyakiti orang lain secara mental dan emosi. Kes buli siber semakin meningkat, dan walaupun ia tidak melibatkan sentuhan fizikal, kesannya sangat besar, terutama kepada kesihatan mental kita.

8. Pernah tak kamu nampak kawan atau diri sendiri menjadi mangsa buli di atas talian? Jika ya, kamu perlu beritahu ibu bapa, guru, atau orang dewasa lain yang kamu percayai. Kamu juga boleh gunakan Talian Kasih untuk mendapatkan bantuan.
9. Kalau adik-adik rasa tak pasti, kalau adik-adik rasa tak berani, jangan malu dan jangan takut nak minta tolong. **Boleh call nombor 15999 (Satu – Lima – Sembilan – Sembilan –**

Sembilan). Boleh ulang tak bersama saya? 15999. Bagus, terima kasih.

10. Ingat, kita semua ada hak untuk dilindungi. Jaga diri dan kawan-kawan kita! Kalau ada kawan yang susah atau tidak selamat, cepat-cepat beritahu orang dewasa yang boleh membantu.

Peranan Masyarakat Dalam Melindungi Kanak-Kanak

11. Masyarakat harus tahu apa yang perlu dilakukan jika tahu ada kanak-kanak yang mengalami penderaan atau pengabaian. Jika melihat sesuatu yang mencurigakan, laporkan segera kepada polis atau Talian Kasih di 15999. Jangan hanya rakam video untuk media sosial, tapi laporkan kepada kami.

12. Ibu bapa harus mengajar kita tentang sentuhan selamat dan tidak selamat serta memastikan kita tahu apa yang perlu dilakukan jika berhadapan dengan situasi yang tidak selamat.

Masyarakat pula perlu peka dan cakna terhadap keadaan sekeliling. Jika mereka nampak ada kanak-kanak dalam bahaya, mereka mesti segera bertindak untuk membantu.

13. Saya bagi pihak Kementerian Pembangunan Wanita, Keluarga dan Masyarakat (KPWK), amat berharap dengan penyertaan anda semua pada hari ini dapat meningkatkan kefahaman agar kita semua lebih peka dan cakna akan isu kanak-kanak. Besar harapan saya agar kita bersama-sama mencari penyelesaian yang tepat dalam membantu mengatasi masalah sosial berkaitan kanak-kanak.

14. Akhir kata, saya amat berterima kasih di atas jasa dan pengorbanan puan-puan dan tuan-tuan sebagai guru dan ahli masyarakat yang sentiasa bertanggungjawab dalam menjaga keselamatan kanak-kanak. Sebelum saya mengundur diri, saya ingin mengucapkan syabas dan tahniah kepada pihak penganjur. Semoga pertemuan kita pada hari ini memberi semangat kepada tuan/puan untuk terus berperanan aktif dalam memastikan kesejahteraan kanak-kanak diberi keutamaan. Saya juga berharap advokasi ini diteruskan di

seluruh sekolah di Negeri Terengganu dengan satu harapan, kita berjaya mencapai Sifar Dera dan Abai Kanak-Kanak di Negeri Terengganu.

15. Terima kasih diucapkan kepada semua pihak yang terlibat secara langsung atau tidak langsung dalam program ini, termasuk penceramah dan pempamer daripada Jabatan Kebajikan Masyarakat (JKM), Polis DiRaja Malaysia (PDRM), Suruhanjaya Komunikasi dan Multimedia Malaysia (SKMM), Jabatan Pembangunan Wanita (JPW), Lembaga Penduduk

dan Pembangunan Keluarga Negara (LPPKN), Agensi Antidadah Kebangsaan (AADK), dan lain-lain.

16. Akhir kata, serangkap pantun dari saya

Masyarakat harmoni kanak-kanak sejahtera

Saling menyayangi dan berkerjasama

KASIH kanak-kanak mari laksana

Hidup bahagia aman sentosa

Sekian, Wabillahi Taufiq Wal Hidayah

Wassalamualaikum Warahmatullahi Wabarakatuh.

Dato' Sri Hajah Nancy binti Haji Shukri
Menteri Pembangunan Wanita, Keluarga Dan Masyarakat
29 Ogos 2024 (Khamis)